



ՀԱՅԱՍՏԱՆԻ ՊԵՏԱԿԱՆ  
ՏՆՏԵՍԱԳԻՏԱԿԱՆ  
ՀԱՄԱԼՍԱՐԱՆ

## **ՀՊՏՀ ռեկտոր, պրոֆեսոր Կորյուն Աթոյանի խոսքը Բրիտանական բիզնես դպրոցի բացմանը**

Հայաստանի Հանրապետության մեծարգո վարչապետ, Ազգային ժողովի հարգարժան պատգամավորներ, կառավարության հարգարժան անդամներ, Մեծ Բրիտանիայի հարգելի դեսպան, համալսարանի խորհրդի հարգելի անդամներ, հյուրեր, ներկաներ

Ինչպես գիտեք 2005թ. մայիսի 19-ին ստորագրված Բոլոնիայի անդամ երկրների կրթության նախարարների Բերգենի Կոմյունիկեով Հայաստանը պաշտոնապես միացավ Բոլոնիայի գործընթացին, որի վերջնական պատակը հայաստանյան կրթական համակարգը եվրոպական կրթական տարածքին ինտեգրելն էր: Սա բարեփոխումների մեծ և լուրջ ճանապարհ էր հայաստանյան բարձրագույն ուսումնական հաստատությունների համար, իսկ այն գիտակցումը, որ եվրոպական կրթական համակարգը մեծ հեղինակություն ունի, ծանրակշիռ կովան էր մեր ճանապարհին: Եվրոպական կրթական տարածքին ինտեգրվելու ճանապարհին իր ուրույն ընթացքն է ունեցել նաև Հայաստանի պետական տնտեսագիտական համալսարանը: Այստեղ ևս լուրջ քայլեր են կատարվել գործընթացը ներդնելու, համակարգը կյանքի կոչելու համար:

Համալսարանի միջազգայնացման գործընթացում մեծապես կարևորվել է եվրոպական, հատկապես բրիտանական կրթական հաստատությունների հետ համագործակցություն ձևավորելու հանգամանքը: Եվ այս առումով, բարեբախտաբար, մեր ջանքերը զուր չեն անցել:

Այսօր պատիվ ունենք ձեզ ներկայացնելու Հայաստանում Բրիտանական բիզնես դպրոցի նախագիծը, որը Հայաստանի պետական տնտեսագիտական համալսարանի և «Globe Education (GB) LTD» ընկերության միջև համագործակցության արդյունք է: Երկուստեք փոխգործակցության արդյունքում, Հայաստանի Հանրապետության Կառավարության որոշմամբ, այսուհետ մեր համալսարանում կգործի Բրիտանական բիզնես դպրոց՝ իր գործունեությունը սկսելով բիզնեսի կառավարման բրիտանական մագիստրոսական ծրագրի իրականացմամբ:

Հայաստանում Բրիտանական բիզնես դպրոցի ուսանողները բացառիկ հնարավորություն են ունենալու ուսումնառության ընթացքում, նույն ուսման վարձի շրջանակներում, երկու մոդուլի մասնակցել Լոնդոնի Կոմերցիայի դպրոցի այլ մասնաճյուղերում, այդ թվում՝ Լոնդոնում, Մալթայում և այլուր: Դասընթացը

հաջողությամբ ավարտած ուսանողները կստանան բրիտանական միջազգային ճանաչում ունեցող Անգլիա Ռասկին համալսարանի մագիստրոսի դիպլոմ:

Հարգելի հյուրեր

Բրիտանական բիզնես դպրոցի հիմնումը մեր համալսարանի միակ ձեռքբերումը չէ: Տնտեսագիտական համալսարանը վերջին տարիներին հաջողություն է արձանագրել նաև Եվրամիության Տեմպուսի ծրագրերում ընդգրկվելու առումով: Մեր համալսարանն այս պահին ընդգրկված է Տեմպուսի 7 և շվեյցարական 1 ծրագրերում: Ընդ որում, Տեմպուսի ծրագրերից մեկի՝ «Արարատի» դեպքում, բուհը նաև համակարգող է, ինչը նույնպես նորություն է համալսարանի պատմության մեջ:

Հարգելի հյուրեր

Ավելի քան 3 տարի «Մենք փոխվում ենք» կարգախոսի ներքո Հայաստանի պետական տնտեսագիտական համալսարանում իրականացվում են բարեփոխումներ՝ միտված համալսարանի հեղինակության ամրապնդմանը, կրթական միջավայրի և կրթության որակի բարելավմանը, համալսարանում հետազոտական ուղղության զարգացմանը: Համալսարանի ավանդույթների պահպանման և առկա ձեռքբերումները նոր ժամանակներին ու մարտահրավերներին համահունչ զարգացնելու ճանապարհին մենք բավական հաջողություններ ենք ունեցել: Համալսարան մտնող յուրաքանչյուր ոք անզեն աչքով էլ տեսնում է, թե որքան է վերափոխվել մեր սիրելի համալսարանը՝ դարձել գրավիչ, ինքնատիպ միջավայրով, ուրույն ձևավորմամբ, տեխնիկապես վերազինված:

Մեզ համար շատ կարևոր է «Ամբերդ» հետազոտական կենտրոնի ստեղծումը, որն առաջին խոշոր քայլն է համալսարանում գիտահետազոտական բաղադրիչն ամրապնդելու ուղղությամբ: Համալսարանի սեփական միջոցների 3,7 տոկոսը մենք հատկացնում ենք բուհական գիտության զարգացմանը: «Ամբերդը» հավակնում է դառնալ հայաստանյան պետական կառույցների, տնտեսության տարբեր ճյուղերի զարգացման համար անհրաժեշտ վերլուծություններ ու փորձագիտական մտեցումներ առաջարկող հեղինակավոր կենտրոն:

Բուհի զարգացման բոլոր ուղղություններով մենք զգալի ձեռքբերումներ ունենք: Ուրախալի է, որ հերթական ձեռքբերումը համալսարանի միջազգայնացման ճանապարհին է, և մենք այսօր միասին տոնում ենք այս հաջողությունը:

Կրթությունը յուրաքանչյուր պետության համար առանցքային նշանակության ոլորտ է, պատմությունը վկայում է՝ զուր չեն ներդրումներն այս բնագավառում: Մեր երկրի ապագան, մեր բոլորի վաղվա օրը, պետության հեղինակությունն ու հաջողությունը, բարեկեցությունն ու ամրությունը պայմանավորված են նախ և առաջ կիրթ, գրագետ սերունդ ունենալու հանգամանքով: Ուստի մեր պարտքն է անշեղորեն շարունակելու մեր ճանապարհը, հետևողականորեն իրագործելու համալսարանական կրթության որակի բարձրացման պարտավորեցնող առաքելությունը:

Մեր բոլոր հաջողությունների համար մենք շնորհակալ ենք Հայաստանի Հանրապետության նախագահին, Ազգային ժողովին, Կառավարությանը, համալսարանի խորհրդի անդամներին՝ ի դեմս խորհրդի նախագահ հարգարժան պարոն Հովիկ Աբրահամյանի, և բոլոր այն մարդկանց, ովքեր ևս կարևորել են համալսարանի առաջխաղացումն ու հանդես եկել աջակցությամբ: Բիզնես դպրոցի ստեղծման համար ցանկանում եմ հատուկ շնորհակալություն հայտնել նաև Մեծ Բրիտանիայի մեր գործընկերներին՝ Հայաստանում Մեծ Բրիտանիայի արտակարգ և լիազոր դեսպան ձերդ գերագանցություն Քեթրին Ջեյն Լիչին, Էլ Էս սի (LSC) խմբի խորհրդի նախագահ Լորդ Ջոն Թոմլինսոնին, խմբի գործադիր տնօրեն Թիմ Անդրադիին, Անգլիա Ռասկին համալսարանի ղեկավարությանը՝ ի դեմս այսօր ներկա պրոռեկտոր Թրեվոր Բոլթոնի, որոնց ջանքերի, կառուցողական համագործակցության և սրտացավ վերաբերմունքի շնորհիվ այսօր իրականություն է դարձել Հայաստանում Բրիտանական բիզնես դպրոց հիմնելու գաղափարը: Հուսով եմ, որ միջազգային այս նախագիծը մեծ հեղինակություն կբերի ոչ միայն մեր բուհին, այլև մեր երկրին: Հաջողություն ու բարի երթ եմ մաղթում բիզնես դպրոցին:

Շնորհակալություն ուշադրության համար:

Հարգանքով՝

ՀՊՏՀ ռեկտոր, պրոֆեսոր

ԿՈՐՅՈՒՆ ԱԹՈՅԱՆ